

թիւնից: Ես այն տեսակ անկողին չէի տեսել իմ կեանքում: Գլուխս փափուկ բարձի վրայ դնելը եւ աչքերս փակոելը՝ միեւնոյն թոպեում կատարուեցան:

Գիշերոյ կեսին ես զարթեցայ. սաստիկ ծարաւ էի: Վանայ աղի տառե-խը ուտելը հեշտ բան չէ, այն եւս գիշերը: Բայց մեծ եղաւ իմ զարմանքը, երբ տեսայ, որ Ասլանը դեռ քնած չէր: Նա նստած էր աշտանակի հանդէպ, որի վրայ վառուում էր իւղային ճրագը: Ինչ-որ գրում էր:

– Այդ ի՞նչ ես գրում, – հարցրի նրանից:

– Նամակներ, – պատասխանեց նա: – Վաղը առաւօտեան մեր թղթա-տարը մեկնելու է...

Արդեօք դէպի ո՞ր կողմը, արդեօք ո՞ւմ պետք է նամակ տանէ, – այդ մասին նա ոչինչ չխօսեց:

– Եթէ որսորդին գրելու լինես, իմ կողմից ողջունիր, – խնդրեցի նրա-նից:

– Լաւ, – ասաց նա եւ շարունակեց իր գործը:

Ես նկատեցի, նա չէ ուզում, որ ես նրան խանգարեմ: Լուռ կացայ: Զու-նը փախաւ իմ աչքերից: Անկողնիս մէջ պառկած, մի առանձին ապշու-թեամբ նայում էի Ասլանի վրայ: Նա երեւում էր ինձ որպէս մի մարմնացած գործունէութիւն: Բայց ի՞նչ նպատակի համար էր գործում այդ անխոնջ, մշ-տապտոյտ ուժը, ես հասկանալ չէի կարողանում: Փետուրեայ գրիչը երբեմն թղթի վրայ սլանում էր, որպէս նրա սրաթռիչ միտքը, իսկ երբեմն նա շարժ-ւում էր դանդաղ, շրջանկատ կերպով, որպէս հեռատես զգուշութիւն: Եթէ ես վեր առնէի այն նամակներից մէկը, անտարակոյս, կարդալ չպիտի կարողա-նայի, թէեւ նրանք գրուած էին հայոց տառերով եւ հայերէն լեզուով: Գրելու այդ ձեւը ես յետոյ սովորեցի, դա պայմանական մի ձեւ է, որ միայն նամակի գրո-ղին եւ ստացողին է յայտնի:

Ասլանը գրում էր: Ես շարունակում էի նայել նրա վրայ, եւ միեւնոյն ժա-մանակ զանազան մտածութիւններ զբաղեցնում էին իմ անփորձ գլուխը: Այդ մտածութիւններն այնքան խառն, այնքան անկապ էին, որ անկարելի էր նրանցից մի որոշ եզրակացութիւն դուրս բերել: Իմ երեւակայութեան մէջ, որպէս անրջական տեսիլքներ, պատկերանում եւ դարձեալ աներեւութա-նում էին այն փոփոխութիւնները, թէ որքա՞ն անգամ եւ որպիսի՞ տարբեր կերպարանքներով այդ խորհրդաւոր երիտասարդը յայտնուել էր ինձ: Երբեմն տեսնում էի նրան արաբական միւնարեթում, այն ամայի, մշտալուռ աւերակ-ների մէջ, իր աւազակային խմբով, բոլորած բոցավառ փայտակոյտի շուր-ջը, անքուն սպասում էին, որ գիշերային խաւարը թանձրանայ, որ ճանա-